



Uffeci communal Lumnezia / Gemeindeamt Lumnezia

Canzlia communal / Gemeindekanzlei

7144 Vella

Tel 081 920 60 00

Fax 081 920 60 18

e-mail: info@lumnezia.ch

www.lumnezia.ch

PROTOCOL RADUNONZA COMMUNALA LUMNEZIA 14 DA ZERCLADUR 2019

2019/02

14 DA ZERCLADUR 2019
CANZLIA COMMUNALA LUMNEZIA
Palus 32D, 7144 Vella

Tractandas

1. Avertura ed elecziun dils dumbravuschs.....	2
2. Protocol radunonza communal 22 da mars 2019 (2019/01).....	2
3. Rapport annual 2018.....	3
a. Quen annual 2018	3
b. Rapport da revisiun dalla cumissiun da gestiun.....	5
c. Approbaziun dil quen annual 2018 e scarica alla suprastonza communal.....	5
4. Rendaquen da project sistem da separar l'aua piarsa schubra e tschuffa e per novs conducts per deviar au da plievgia egl areal Sut Vitg, Zigliolas e Cresta a Morissen	5
5. Cumpra d'in vehichel communal (transporter) pil menaschi tecnic dalla vischnaunca Lumnezia.....	6
a. Approbaziun dil project	6
b. Concessiun dil credit da CHF 230'000.....	7
6. Sanaziun dalla via da funs Schlareins – Bars	7
a. Approbaziun dil project.....	7
b. Concessiun dil credit da CHF 450'000	7
7. Damonda per il dretg da burgheis dalla vischnaunca Lumnezia	8
Alessio Digeronimo.....	8
8. Concessiun dretg da baghegiar el quartier Bual, Vella	8
Pia e Kilian Burger, Mythenweg 5, 8607 Aathal-Seegräben.....	8
9. Varia.....	9

Protocol dalla radunonza communal Lumnezia (2019/02)

Datum: Venderdis, ils 14 da zercladur 2019
 Liug: Halla plurivalenta dalla casa da scola Sutvitg 28E, 7144 Vella
 Cuoz: 20:00 – 21.20 uras
 Presents: 66 votantas e votants, 4 hosps
 Parsura: Duri Blumenthal, president communal
 Actuar: Marcus Cavegn, canzlist communal

Tractandas

1. Avertura ed elecziun dils dumbravuschs

Il president communal Duri Blumenthal arva la radunonza communal fagend beinvegni als presents ed engrazia ad els d’haver dau suatientscha agl invit. Specialmein beneventa el la famiglia Pia e Kilian Burger

El constatescha, che la radunonza communal ei vegnida convocada ad uras conform allas determinaziuns digl artechel 44 ella constituziun dalla vischnaunca Lumnezia, aschia che la radunonza ei cumpetenta da prender conclus.

La radunonza communal approbescha la gliesta da tractandas dils 27 da matg 2019 presentada dalla suprastanza communal.

Seschau perstgisar han:

- Daniel Blumenthal, actuar dalla cumissiun da gestiun
- Gioni Capaul, schef departament communal per fatgs da baghegiar;
- Conradin Caduff
- Irena ed Ueli Caduff-Riedi.

La radunonza elegia dus dumbravuschs:

- Priscus Capaul, Lumbrein
- Remigi Brunold, Vella

2. Protocol radunonza communal 22 da mars 2019 (2019/01)

Il protocol dalla davosa radunonza communal dils 22 da mars 2019 ei staus exponius ella canzlia communal e silla pagina d’internet dalla vischnaunca, denton aunc buca duront il temps da 30 gis ch’ei pretendi tenor art. 34 dalla constituziun dalla vischnaunca Lumnezia.

Il president communal Duri Blumenthal constatescha, ch’igl ei vegniu inoltrau recuors dalla cumissiun da gestiun pervia dall’indicaziun d’in falliu datum per l’approbaziun dalla gliesta da tractandas.

La radunonza communal decida da curreger il sbagli e d’approbar il protocol dils 22 da mars 2019 (2019/01) cun resalva ch’ei vegni buca inoltrau ulteriurs recuors enteifer il temps dall’exposiziun publica da 30 gis, che cuoza entochen ils 24 da zercladur 2019.

1. Avertura ed elecziun dils dumbravuschs

Text remplazzau:

La radunonza communal approbescha la gliesta da tractandas dils 28 da november 2018 presentada dalla suprastanza communal.

Text curregiu:

La radunonza communal approbescha la gliesta da tractandas dils 08 da mars 2019 presentada dalla suprastanza communal.

3. Rapport annual 2018

a. Quen annual 2018

Il president communal Duri Blumenthal presenta summaricamein il quen annual 2018 e dat ina survesta generala.

La contabilitad se basa sil niev model armonisà da contabilitad (MAC2) Tenor quel vegnan las amortisaziuns sco era las premias dall'assicuranza d'objects repartidas sin mintga funcziun. Las amortisaziuns ordinaris succedan a moda lineara sin basa dil temps da diever tenor categoria dall'investiziun. Sper amortisaziuns economicas ein pusseivlas amortisaziuns supplementaras, denton ein quellas da cudischar sco cuosts extraordinaris. El cass normal lubescha il MAC2 pia buca pli amortisaziuns supplementaras, aschia ch'igl ei buca pusseivel d'incrementar reservas tgeuas.

Tenor l'ordinaziun da finanzas per las vischnancas entscheivan las amortisaziuns dallas investiziuns ella facultad administrativa il mument che las investiziuns vegnan duvradas. Igl emprum onn dall'utilisaziun vegn fatga in'amortisaziun annuala. Investiziuns en construcziun ston buca vegnir amortisadas.

En consequenza dil niev model da contabilitad ei il quen 2018 buca pli cumparegliabels directamein cul quen annual 2017, che se basa sil model MAC1. Per quei cuntegn il quen annual mo la cumparegliaziun cul preventiv 2018.

Per la gestiun da finanzas valan las determinaziuns dalla constituziun communal e specialmein era l'ordinaziun cantunala da finanzas per las vischnancas relaschada dalla regenza ils 25 da settember 2012.

Il quen annual 2018 cuntegn las parts

- Resultat cumplet
- Survesta rendaquen e cefras indicativas
- Quen economic (gudogn e sperdita)
- Quen d'investiziun
- Bilanza per ils 31-12-2018
- Quen dalla circulaziun dil mieds finanziaus
- Annexas tier il quen annual 2018. En quellas ein cuntenidas denter auter la cumprova digl agen capital, la survesta dallas garantias, la survesta dalla facultad finanziaia, la survesta dallas investiziuns bilanzadas dalla facultad administrativa, las fatschentas extraordinarias, la valetaziun dil beins materials dalla facultad finanziaia, la controlla dil credits d'obligaziun.

	quen 2018		quen 2017	
	cuosts	recav	cuosts	recav
Resultat cumplet				
Quen da gudogn e sperdita	14'227'276.19	16'734'637.45	16'199'527.71	16'853'260.38
Resultat quen gudogn e sperdita	2'507'361.26		653'732.67	
Quen d'investiziun	4'997'151.05	1'108'648.15	6'402'765.45	1'081'678.40
Resultat quen d'investiziun		3'888'502.90		5'321'087.05
Surpli d'entradas quen da gudogn e sperdita	2'507'361.26		653'732.67	
Deposit finanziaziun speciala	95'566.95		30'284.20	
Prelevaziun finanziaziun speciala		166'373.15		170'984.20
Amortisaziuns	1'116'557.45		3'920'234.65	
Cashflow	3'553'112.51		4'433'267.32	
Resultat quen d'investiziun		3'888'502.90		5'321'087.05
▪ Deficit ni surpli da finanziaziun	335'390.39		887'819.73	

Survesta rendaquen				
Quen da gudogn e sperdita sur treis scalems		quen 2018	preventiv 2018	
	Cuosts da menaschi	12'512'751.09	13'595'580.00	
30	Cuosts da personal	4'842'968.75	5'051'130.00	
31	Cuosts da material e menaschi	4'138'294.99	4'155'750.00	
33	Amortisaziuns facultad administrativa	1'116'557.45	1'797'500.00	
35	Deposit en fondos e finanziaziuns specialas	95'566.95	8'700.00	
36	Cuosts da transfer	2'319'362.95	2'582'500.00	
37	Contribuziuns transitorias	0.00	0.00	
	Recavs da menaschi	14'573'020.95	13'171'300.00	
40	Recav fiscal	6'833'974.05	6'009'000.00	
41	Regals e concessiuns	1'372'679.90	1'369'500.00	
42	Indemnisaziuns	2'190'335.80	1'610'500.00	
43	Divers recavs	71'398.30	6'000.00	
45	Prelevaziuns ord fondos e finanziaziuns specialas	166'373.15	376'800.00	
46	Recav da transfer	3'938'259.75	3'799'500.00	
47	Contribuziuns transitorias	0.00	0.00	
	Resultat dall'actividad da menaschi	2'060'269.86	-424'280.00	
34	Cuosts da facultad	322'510.70	186'700.00	
44	Recav da facultad	769'602.10	738'400.00	
	Resultat da finanziaziun	447'091.40	551'700.00	
	Resultat operativ	2'507'361.26	127'420.00	
38	Cuosts extraordinaris	0.00	0.00	
48	Recav extraordinari	0.00	0.00	
	Resultat extraordinari	0.00	0.00	
	Resultat total quen da gudogn e sperdita	2'507'361.26	127'420.00	
	(+ = surpli dils recavs / - = surpli dils cuosts)			
39	Scuntradas internas	1'392'014.40	1'472'700.00	
49	Scuntradas internas	1'392'014.40	1'472'700.00	
	Quen d'investiziun	quen 2018	preventiv 2018	
	Cuosts d'investiziun	4'997'151.05	8'295'000.00	
50	Beins materials dalla facultad administrativa	4'994'745.80	8'250'000.00	
51	Investiziuns sin quen da tiarzas personas	2'405.25	0.00	
52	Beins d'investiziun immaterials	0.00	0.00	
54	Emprests	0.00	0.00	
55	Participaziuns e capital da basa	0.00	45'000.00	
56	Atgnas contribuziuns d'investiziun	0.00	0.00	
58	Investiziuns extraordinarias	0.00	0.00	
	Recavs d'investiziun	1'108'648.15	1'440'150.00	
60	Transferiments da facultad administrativa ella facultad finanz.	0.00	0.00	
61	Restituziuns	97'025.20	59'450.00	
62	Transferiments da beins d'investiziun ella facultad finanzia	0.00	0.00	
63	Contribuziuns d'investiziun sin agen quen	1'011'622.95	1'380'700.00	
64	Restituziuns d'emprests	0.00	0.00	
65	Transferiments da partizipaziuns ella facultad finanzia	0.00	0.00	
66	Restituziuns d'atgnas contribuziuns d'investiziun	0.00	0.00	
68	Entradas d'investiziun extraordinarias	0.00	0.00	
	Resultat quen d'investiziun	-3'888'502.90	-6'854'850.00	
	Atgna finanziaziun	3'553'112.51	1'556'820.00	
	Resultat da finanziaziun	-335'390.39	-5'298'030.00	
	(+ = Surpli da finanziaziun / - = deficit da finanziaziun)			

Cefras indicativas		
Grad da l'atgna finanziaziun	91.37%	22.71%
Quota da l'atgna finanziaziun	23.16%	11.19%
Quota dil survetsch da capital	7.27%	13.00%
Quota dils deivets brut	23.20%	37.61%
Quota d'investiziun	30.07%	40.92%
Deivet net absolut	-23'335'604.43	-23'670'994.82
Deivet net per habitont (2057) (+ = deivet / - = facultad)	-11'344.48	-11'507.53

Dameins cuosts ein sedai oravontut el sector da scolaziun e formaziun. Quei ei stau la conseguenza dalla reducziun dil diember da classas da scola. Era ils cuosts pils secturs segirtad publica, sanadad ed ovras socialas ein pli bass che budgetau.

b. Rapport da revisiun dalla cumissiun da gestiun

Hilda Livers, presidenta dalla cumissiun da gestiun declara che la cumissiun da gestiun sco era il post da revisiun, Confidar Treuhand AG, hagian examinau il quen annual 2018 tenor Art. 61 dalla constituziun. Ella attesta ch'il quen seigi menaus schubramein e conform alla lescha. Il bien resultat seigi era la conseguenza dil niev model per la contabilitad cun amortisaziuns ordinarias linearas e senza amortisaziuns supplementaras.

La midada sil niev model armonisà da contabilitad (MAC2), l'adattaziun digl entir plan da contos dalla contabilitad, la valetaziun nova dils beins immobiliars falla facultad finanziaria, la purificaziun dalla bilanza e.a.v. ei stada ina gronda sfida oravontut per la partiziun finanzas/persunal dall'administraziun communal. Egl avegnir seigi impurtonta ina buna planisaziun dallas investiziuns.

Hilda Livers engrazia en num dalla cumissiun da gestiun alla suprastanza communal, all'administraziun communal ed a tuts emploiai per la gronda e buna lavur prestada. Ella recamonda d'approbar il quen annual 2018 e dar scarica alla suprastanza communal sco era a tuts officials e funcziunaris dalla vischnaunca.

c. Approbaziun dil quen annual 2018 e scarica alla suprastanza communal

La radunonza communal concluda cun gronda majoritad, senza cuntravusch ed abstenziuns, d'approbar il quen annual 2018 e da dar scarica alla suprastanza communal.

4. Rendaquen da project sistem da separar l'aua piarsa schubra e tschuffa e per novs conducts per deviar aua da plievgia egl areal Sut Vitg, Zigliolas e Cresta a Morissen

Situaziun iniciala

Ils 15 da zercladur 2018 ha la radunonza communal approbau il project dil sistem da separar l'aua piarsa schubra e tschuffa e per novs conducts per deviar aua da plievgia egl areal Sut Vitg, Zigliolas e Cresta a Morissen ed ha concediu il credit da CHF 190'000. Il project ei vegnius realisau ed il rendaquen siara cun cuosts da CHF 139'720.35, netto inclusiv taglia sin valeta augmentada. Dil credit ei pia vanzada ina summa da CHF 50'279.65.

Decisiun

La radunonza communal concluda cun gronda majoritad, senza cuntravusch ed abstenziuns, d'approbar il rendaquen da project dil sistem da separar l'aua piarsa schubra e tschuffa e per novs conducts per deviar aua da plievgia egl areal Sut Vitg, Zigliolas e Cresta a Morissen.

5. Cumpra d'in vehichel communal (transporter) pil menaschi tecnic dalla vischnaunca Lumnezia

a. Approbaziun dil project

Situaziun iniziala

La vischnaunca da Lumnezia ha ina reit da vias da ver 250 km cumpriu las vias da meglieraziun. Per far las lavurs da manteniment drova il survetsch tecnic in equipament adattau. El preventiv dil quen d'investiziuns 2019 dalla vischnaunca ei prevedida la summa da CHF 250'000 per il remplazzament da vehichels communs (conto 6190.5060.00).

Per la cumpra dad in vehichel communal (transporter) pil survetsch tecnic dalla vischnaunca Lumnezia ein vegnidas tratgas en offertas da quater garaschas enteifer ed ordeifer la val. Las offertas ein vegnidas valetadas tenor ils criteris prezi (50 %), funcziunalitad (30 %), sligiazium dil service e manteniment sco era prestaziuns da garanzia (10 %), compatibilitad cun las maschinas ch'ei en funcziun pil survetsch tecnic (5 %), referenzas (5 %).

Prevedius ei in transporter cun treis punts ni bignolas che san vegnir descargadas cun in lift vid in crutsch. Quei para d'esser pli cunvegnent per che la macchina seigi buca occupada durant il temps che la bignola vegn emplenida. Il transporter vegn buca duvraus per fierer ora sal igl unviern.

Las offertas cuntengan opziuns che fussen adattadas. Cun quellas vegn il vehichel sin rodond CHF 230'000. Il prezi da brat da rodond CHF 30'000 per il vehichel vegl ei scuntraus en quella summa.

Il menader dil survetsch tecnic dalla vischnaunca, Mario Alig, explichescha ch'il transporter dueigi remplazzar ina macchina dil tip Reform Mounty, ch'ei staus en funcziun ca. 9000 uras. Ei setracta d'ina macchina per stad ed unviern. Ils jeeps ein buca fermes avunda per peisas grondas. Ella evaluaziun ein vegni empruai ora treis tips da maschinas. Il survetsch tecnic ha saviu empruar ora quels vehichels tier autras vischnauncas ed ei vegnius tier la conclusiu ch'in vehichel cun in crutsch per muldas survess il meglier.

Discussiun

Marcel Capeder ei dil meini ch'ei fussi meglier da cumprar in transporter cun ina punt da cupitgar sin treis varts enstagl dil sistem cun treis bignolas che vegnan cargadas cun in crutsch. Igl indrez da cargar cun in crutsch hagi persuls ina peisa da rodond 800 kg ed aschia seigi la macchina mintgagada surcargada. Quei indrez e las treis bignolas cuostien denter 40 – 50 melli francs. Per saver far ora neiv cun in crieic stuessi vegnir mess ina peisa sin ina punt. Igl cundrez proponiu seigi luxus ed ins hagi buca la pusseivladad da cupitgar ina punt sin treis varts. La glied hagi lu il sentiment ch'ils luvriers communs fetschien mo termagls cun las maschinas.

Mario Alig inidchescha ina peisa da 650 kg per igl indrez da cargar cun in crutsch e cuosts da ca. 30 melli francs. La macchina vegni buca duvrada per trer sal. El accepta buca la reproscha ch'ils luvriers communs fetschien mo termagls. Il survetsch tecnic hagi da schubegiar si tut las miardas che la glied lai anavos, il disuorden sils plazs da rimnar il curdem vert, ils plazs da rimnar rumien da casa, las deponias illegalas ed igl auter, far las rimnadas da rumien bloccont nua ch'ins detti buca damogn.

Propostas

La suprastonza communal propona da conceder in credit da CHF 230'000 per la cumpra d'in vehichel communal (transporter) pil menaschi tecnic dalla vischnaunca Lumnezia.

Marcel Capeder propona da cumprar ina macchina senza indrez da cargar cun in crutsch e da reducir il credit per CHF 30'000.

b. Concessiun dil credit da CHF 230'000

Decisiun

La radunonza communal concluda cun 50 vuschs per la proposta dalla suprastanza communal encunter 5 vuschs per ina cuntraproposta da conceder il credit da CHF 230'000 per cumprar il niev vehichel communal (transporter Reform Muli T10 X) cun treis differentas bignolas ed ina punt per fixar peisas, sco era in crie da far ora neiv.

6. Sanaziun dalla via da funs Schlareins – Bars

a. Approbaziun dil project

- La via da meglieraziun che meina naven da Schlareins sils cuolms da Lumbrein tochen Bars sils cuolms da Vignogn ei mintgamai asfaltada all'entschatta da mintga vart, il grond toc da 1300 m ha mo ina cuvrada cun material da plania. Quella part duei vegnir sanada.
- Oriundamein era ei prevediu da far las lavurs da sanar la via da funs Schlareins – Bars en duas etappas. El preventiv communal 2019 ei prevedida da summa da CHF 250'000 per l'emprema etapa da quei project (conto 8120.5010.04). Igl onn 2020 fuss stada prevedida aunc inaga la medema summa. Cun far tut las lavurs igl onn 2019 duein quellas vegnir pli favureivlas.
- Intenziunada ei la construcziun da dus vials da betun per evitar ch'il material dalla via vegni lavaus naven en cass da malauras. Tenor ils profils da norma han ils vials ina ladezia da mintgamai 110 cm, denteren ei ina sdrema da 80 cm ed ina banchina da 50 cm dalla vart sut e 35 cm dalla vart sura. La via existenta vegn buca slargada. Ils vials vegnan mess cumpleinamein sin la via existenta. Il betun ha ina grossezia da 16 cm. La plania dalla via existenta vegn duvrada per emplenir la sdrema denter ils dus vials.
- La calculaziun da cuosts ei vegnida fatga sin basa d'offertas per las lavurs d'impressari. Las lavurs da betunar duein vegnir fatgas cun ina maschina e buca a maun, per ch'il betun vegni pli ulivs.
- Sin fundament dall'offerta la pli favureivla dall'interpresa da baghegiar Collenberg SA, Caplutta 8A, 7148 Lumbrein vegn quintau cun suandontas expensas.

Lavurs impressari da baghegiar (senza spilgers)	CHF	386'103.25
Spilgers (53 tocs)	CHF	12'000.00
Lubientscha da baghegiar	CHF	1'500.00
Mesiraziun Straub AG	CHF	5'000.00
Devisaziun dallas lavurs da baghegiar	CHF	3'000.00
Survigilanza tras menader survetsch tecnic vischnaunca	CHF	10'000.00
Nunprevediu (7.76 %)	CHF	<u>32'396.75</u>
Total	CHF	<u>450'000.00</u>

- La finanziaziun succeda senza subvenziuns dil cantun e dalla Confederaziun. Igl uffeci per agricultura e geoinformaziun dil cantun Grischun renconuscha plitost grondas investiziuns per vias da meglieraziun, sche la vischnaunca surpren persula ils cuosts per projects pli pigns.

b. Concessiun dil credit da CHF 450'000

La radunonza communal decida cun gronda maiortad, senza cuntravusch ed abstenziuns, d'approbar il project e da conceder in credit da CHF 450'000 per sanar la via da funs Schlareins – Bars.

7. Damonda per il dretg da burgheis dalla vischnaunca Lumnezia

Alessio Digeronimo

Situaziun iniziala

Ils 28 da mars 2019 ha Alessio Digeronimo fatg la damonda da natiralisaziun pil dretg da burgheis dalla vischnaunca da Lumnezia.

Alessio Digeronimo	Im Grund 4, 8424 Embrach
Naschius ils	19 d'avrel 2002 a Turitg ZH
Fegl da	Digeronimo Sandra Giovanna, naschida ils 24 da november 1980, da Volketswil ZH e Lumnezia GR (Lumbrein)
Burgheis da	Volketswil ZH
Stadi civil	persuls
Schlatteina	masculin
Activitad professiunala	emprendist digl 1. onn
Affons	buca agens affons

Damai ch'il petent ei in giuvenil aunc buca maiorens eisi buca vegniu pretendiu documentaziuns, sco p.ex. in extract dil register penal, disposiziun da taglia, etc. Per la natiralisaziun vala la lescha dil dretg da burgheis dil cantun Grischun (LDBcant) dils 13-06-2017, en vigur dapi 01-01-2018 (DG 130.100).

Proposta

La suprastanza communal propona da garantir il dretg da burgheis dalla vischnaunca Lumnezia ad Alessio Digeronimo, naschius ils 19 d'avrel 2002 a Turitg ZH e desister d'ina taxa da natiralisaziun.

Decisiun

La radunonza communal decida cun gronda maioritad, senza cuntravusch ed abstenziuns da garantir il dretg da burgheis dalla vischnaunca Lumnezia ad Alessio Digeronimo, naschius ils 19 d'avrel 2002 a Turitg ZH, burgheis da Volketswil ZH, e desister d'ina taxa da natiralisaziun.

8. Concessiun dretg da baghegiar el quartier Bual, Vella

Pia e Kilian Burger, Mythenweg 5, 8607 Aathal-Seegräben

Situaziun iniziala

- 1) La famiglia Burger ha dapi plirs onns ina casa da vacanzas a Sursaissa e fan il pendular prest mintga fin d'jamna naven da Aathal sidangiu. Pia Burger ei media practiconta per medischina interna a Wetzikon e vul luvrar el futur en Surselva. Kilian Burger ha ina posiziun da cader tier la fatschenta Schneider Electric, ei bia egl exteriur ni lavura naven da casa. Els han ina feglia da sis onns che va ell'emprema classa primara.
- 2) La famiglia ha l'intenziun da vegnir en Lumnezia a habitar. Suenter haver priu envesta dallas parcelas dil quartier Bual a Vella, han els demussau igl interess da cumprar la parcella dil dretg da baghegiar nr. D4826. Il clavau sin parcella nr. 4627 dominescha tenor els il liug e perquei vegn la parcella dil dretg da baghegiar en damonda mo lu, sch'els san era cumprar quei clavau. La possessura dalla parcella nr. 4627 hagi confirmau a bucca ch'ella fussi promptada vender il clavau.

Proposta

La suprastanza communal propona da conceder a Pia e Kilian Burger in dretg da baghegiar el quartier Bual a Vella cun formar la parcella dil dretg da baghegiar nr. D4826 Bual.

Decisiun

La radunonza communal decide cun gronda maiortad, senza cuntravusch ed abstenziuns da metter a disposiziun a Pia e Kilian Burger, Mythenweg 5, 8607 Aathal-Seegräben la parcella dil dretg da baghegiar nr. D4826 Bual, Vella. Sco basa dils contracts pil dretg da baghegiar valan il reglament dils 17 da december 2008 per ils dretgs da baghegiar dalla vischnaunca da Vella ella zona per indigens a Bual ed ils conclus dalla radunonza communal dils 23 da zercladur 2017 per l'avertura dalla secunda etappa dil terren da baghegiar Bual a Vella.

9. Varia

1) Projects egl areal entuorn il lag Davos Munts

La suprastonza communal ha schau far ina studia che cumpren ils projects da velo che la vischnaunca planisescha pils proxims onns, numnadamein la ruta da bike, in parcour da Cross Country a Cumbel ed in Pumptrack a Davos Munts. Per evitar, che la pista da Pumptrack impedeschi auters plans pigl areal a Davos Munts ha la suprastonza communal decidu da schar far ina studia ed in concept per mesiras da baghegiar ora la purschida egl areal da recreaziun entuorn il lag a Davos Munts.

Il concept preveda da sviluppar purschidas per famiglias cun affons pigns e cumpeglia denter auter in pumptrack per affons pigns ed indrezs per gis da schliat'aura els baghetgs vischinonts. Per traversar la via ei previus in tunnel da stuors che meina naven digl areal dil lag tochen vi sigl areal da campar.

Alla radunonza communal duei vegnir presentada la damonda per in credit da rama per in project general che cuntegn las investiziuns prevedidas sur plirs onns.

2) Rimnada da rumien bloccont

El decuors digl avrel e matg ein puspei vegni rimnai ils rumians blocconts els singuls vischinadis. Igl ei semussau ch'igl uorden funcziunescha buca tenor las cundiziuns publicadas. Ei vegn fatg surdiever e furniu da tuttas uisas, material da rumidas da entirs clavaus e habitaziuns e rumien da casa. Ina controlla ei strusch pusseviva ni mo cun grondas expensas.

La suprastonza communal ha constatau che la rimnada da rumien bloccont ei buca in pensum dil provediment da basa dalla vischnaunca. Mintgin duei ir sez cul rumien bloccont els loghens da rimnada a Rueun. La suprastonza communal ha decidu perquei da buca pli rimnar il rumien bloccont da privats entras la vischnaunca.

3) Rumida da neiv per privats entras la vischnaunca

La vischnaunca porscha a personas privatas il survetsch da rumir lur vias e plazs sut certas cundiziuns. Ei vegn adina puspei fatg pretensiuns stravagadas cura che la neiv duess esser rumida. Beinduras giavischan ils privats da metter ora la neiv sin da quei d'auters, gie buca sigl agen. Per part sto la neiv vegnir transportada naven. Cunquei ch'ei funcziunescha buca a quell'uisa duein las cundiziuns per la rumida da neiv entras il survetsch tecnic dalla vischnaunca Lumnezia vegnir midadas.

En emprema prioritad vegnan rumidas las vias communalas ed ils plazs publics. En secunda prioritad porscha la vischnaunca il survetsch da rumida per vias e plazs privats. Tgi che giavischa ina rumida da neiv sto metter a disposiziun il plaz per deponer la neiv sin agen terren. Quei plaz sto esser situau aschia che la neiv sa vegnir stuschada en in pass da lavur directamein sin quel, senza stuer cargar la neiv ni vegnir ina secunda gada el liug.

Lavurs per rumidas da neiv, che corrispundan buca a quellas cundiziuns, vegnan buca exequidas pli entras la vischnaunca. Quell'incumbensa sa vegnir surdada ual aschi bein a firmas localas ch'ei equipadas culs vehichels corrispundents. Da quellas fatschentas privatas duei era buca vegnir priu naven lavurs, quei che vegn magari insinuau da vegnir fatg.

4) Rimnada da caglias e curdems verds

La vischnaunca metta a disposiziun caums da lenn per rimnar curdems verds sco era caglias e roma. Ei regia la blutta catastrofa cugl uorden cun quei ch'ei vegn era deponiu sacs da rumien, plastic, betun, lenna da baghetgs e.a.v. La vischnaunca ponderescha da montar cameras da survigilanza sils plazs da rimnada ni era da serrar ils plazs da rimnada cun barrieras che vegnan aviartas mo duront certas uras e survigiladas lu.

5) Parc da vent Lumnezia

Igl onn 2010 veva la Altaventa Surselva SA entschiet a planisar in parc da vent egl areal Sezner – Alp Nova - Um Su – Schiarls – Cavel. Il 2012 ei l'ovra Electrica Turitg separticipada, ei denton seretratga igl onn 2014. Igl onn 2016 ei vegnida fundada la Parc da vent Lumnezia SA cugl anteriur president dil cussegl administrativ e cugl anteriur directur dalla Alta Venta SA ensemen cun Guido Schönenberger. Suenter disvaris ei il svilup dil project vegnius fermaus e Guido Schönenberger ha surpriu il tgamun. El ha presentau ina nova varianta per las petgas dils roturs da vent. Il project ei vegnius redimensiunau cun reducir il diember da roturs da vent e restrenscher il parc da vent sigl areal sin territori dalla vischnaunca da Lumnezia.

Plaunsiu duei la populaziun prender ina posiziun e decider da principi da perseguitar il project dil parc da vent ni da serrar il cudisch.

Prevedida ei in'occorrenza d'informaziun. Ils exponents duein referir e presentar lur posiziun. La finala duei haver liug ina votaziun all'urna per ch'ils votants san exprimer lur opiniun.

6) Rumida da neiv sin via cantunala

En in votum damonda Simon Derungs sche la vischnaunca savessi intervegnir ch'ei vegni iu pli ruassavlamein culs camiuns per far ora la neiv sin via cantunala tras ils vitgs. Savens vegni iu cun ina spertadad enorma aschia che la neiv vegn sprizzada tochen si per las casas ed ils passapeis vegnan curclai cun neiv.

7) Rapport annual 2018

La presidenta dalla cumissiun da gestiun, Hilda Livers, metta a pèz da far diever dil rapport annual 2018, che cuntegn bia informaziuns dalla vischnaunca e dat la pusseivladad d'encnuscher meglier ils vischinadis.

8) Finiziu

Il president communal Duri Blumenthal engrazia als convischins che han priu part dalla radunonza communal per lur preschientscha e buna collavuraziun ed envida els da prender part digl aperitiv che vegn purschius suenter la radunonza.

7144 Vella, ils 14 da zercaldur 2019

Il president:

Igl actuar:

Duri Blumenthal

Marcus Cavegn